

# INUIT ATAQATIGIIT

## INATSISARTUNI



20. juli 2016

EM 2016/105

Inatsisartut suleriaasiat § 33 immikkoortoq 1 naapertorlugu matumuuna inatsisartunut aalajangiiffigisassatut siunnersuut imaattoq saqqummiuppara.

**Namminersorneq pillugu inatsit tunngavigalugu isumaqatigiissutaasut oqartussaaffiit akisussaaffiillu nunatsinnut nuunneqartussat pillugit ersarissaasoqassasoq. Taamaalilluni oqartussaaffiit nunatsinnut nuunneqarpata ilisimaneqarsinnaaqullugu oqartussaaffiit aalajangersimasut qanorpiaq sinaakkutissaqqartut, aamma aaningaasaqarnikkut qanoq nunatsinnut pisussaaffiliinersut. Suliassa qarfiit pineqartut qanoq sunnuteqassanersut qulaajaqqullugit Naalakkersuisut danskit naalakkersuisui peqatigalugit ersarissaatitunik nassuiaasioqqullugit peqquneqarnissaannik Inatsisartut aalajangiiffigisassaattut siunnersuut.**

(Inatsisartunut ilaasortaq Aqqaluaq B. Egede, Inuit Ataqatigiit)

### **Tunngavilersuut:**

Nunatsinni aatsitassarsiorneq ineriartortillugu aamma suliffissuaqarnikkut nunatta avataanut niuernermik toqqammaveqartumik ingerlatsinissaq annertusiartortillugu, pisariaqarpoq, -nunatta naalakkersuinikkut mianersoqqissaarluni aqutsinissaa. Nunatta inuisalu aningaasarsiorneq iluaquteqarniarnerat patajaatsuusariaqarpoq.

Massakkullu uppersereerparput Namminersorneq pillugu inatsit sanioqqutaqqajarneqarsinnaasoq, pingaartumik nunatta avataanut pisuussutitsinnik uumaatsunik niurneq tunngavigalugu.

Namminersuleratta siunertaangilaq nunatta pisuussutai naalagaaffeqatitta akisussaaffigilissagaat. Namminersorneq pillugu inatsit tassaangilaq nunatta pisuussutaanik tunngaveqarluni aningaasarsiorneq patajaallisaanissaq kisimi ineriartortinneqassasoq. Allatut oqaatigalugu, namminersorneq pillugu inatsit tassaaniartussaagalarpoq inuiaqatigiittut pisuussutitta niuerutiginissaannut aningaasarsiorneq siuarsaataasumik niueruteqarnitsigut namminiilivinnissatta akissaqarfigilernissaa, aamma piviusunngortinnissaa.

Pinaveersaarniagassarpummi tassaavoq naalakkersuinikkut iliuitsit inuiaqatigiit siunertarinngisaat aalajangersaanikkut timitalersorneqalernissaat. Namminiilivissagutta kukkunata alloriaqatigiittarnissarput pisariaqaaq. Siuarsarnissarput ajornanngitsumik kinguarsalartortinneqarsinnaavoq siunertarinngisavut, paatsooqatigiinnerit avissaarutaasinnaasullu pinngitsoortinniarlugit suleqatigiinnerusariaqarpugut.

Nalunngittariaqarparput Namminersorneq pillugu inatsit tassaangimmat naalakkersuisooqatigiit kisimik imaluunniit illua-tungiliuttut kisimik najoqqutassaat. Ataatsimoorussassaraarput, ataatsimoorussissaguttali akisussaaffiit qanoq agguaqqissaarneqarsimanissaat eqqortumik paasisimanissaat.

Massakkummi takuarput allaat naalagaaffeqatitsinnit nunattalu tungaaniit akisussaaffiit sorliit nunatta akisussaaffigissanerai apequsersuisoqartoq, aamma naalagaaffeqatitta ilumut nunatta avataanut aatsitassanik niueruteqarnissat ilumut naalagaaffeqatitta kisimik akisussaaffigissanerai. Ila Namminersorneq pillugu inatsit taama paatsoorutaasinnaatigippat, taava maani suliaqaarpugut.

Pissutsit taamaannerat pillugu siunnersuut una Inatsisartunut saqqummiuppara. Aaqiisoqartariaqarmat, paatsuungasoqartariaqanngimmat aamma nunatta inuisalu iluaqutiginerpaasinnaasaat suunersut ersaissumik paasineqarsimanissaat pisariaqarmat. Neriuppunga Inatsisartunut ilaasortat siunnersuut taperserlugu Naalakkersuisut Namminersorneq pillugu inatsit ersarissakkamik saqqummiutissagaat. Akisussaaffiillu nunatsinnut nuunneqartussat pillugit qanoq sinaakktissartaqarnersut nalunaarusiorlugit saqqummiinissaat isumaqatigissagaat.

**Pisortanut aningaasatigut allaffissornikkullu kingunerisassat:**

Naatsorsuutigineqarsinnaavoq naatsorsuinerit Naalagaaffik peqatigalugu AC fuldmægtig-ip ukiup ataatsip ingerlanerani 500.000 kr nalinganik suliaqassasoq.

**Namminersorluni inuussutissarsiteqarnermut aningaasatigut allaffissornikkullu kingunerisassat:**

Soqanngilaq

**Innuttaasunut aningaasatigut allaffissornikkullu kingunerisassat:**

Soqanngilaq